

钦定四库全书

集部五

剩语二卷

别集类四

元

提要

（臣）等谨案是集见永乐大典中或题曰艾性夫剩语或题曰艾性夫孤山晚稿而不着性夫为名为字亦不载时代考江西通志称抚州三艾叔可字无可宪可字符德性字天谓皆工于诗性闾门教授执经者盈门着有孤山诗集与永乐大典所题孤山晚稿相合吴澄支言集有高一夔妻艾氏墓志称为咸淳贡士性夫之女习见其家儒效屡以勗其夫云云与永乐大典所题艾性夫合疑江西通志作性夫字天谓传刻失一夫字也考集中有谢枋得挽诗一首则性夫元初尚存又曹安澜言长语称于成化五年之元江署学一家多藏书内一诗集乃江浙道提举艾性夫作贯酸斋作序云云宋无江浙道提举盖其晚年已仕元矣性虽亦讲学之家而其诗气韵清拔以妍雅为宗绝不似宋末有韵之语录五七言古体笔力排荡尤为擅长曹安称其七言律太辣五七言绝歌行语多闢世教并称其铜雀研扑满吟临邛道士招魂歌三首所论颇为得实谨采掇排次厘为二卷用存其概至原书本分集编次其卷目已不可见而永乐大典内题作剩语者较多今故用以标名不复更为分析焉

乾隆四十六年九月恭校上

总纂官 （臣）纪昀 （臣）陆锡熊 （臣）孙士毅

总校官 （臣）陆费墀

●钦定四库全书

剩语卷上

（宋）艾性 撰

○古体诗

感物

中园植佳橘插棘为储胥橘根阳未萌棘枝已扶疎终年高且深势盛凌橘孤岂以雨露偏良由习性殊非类不可依橘其防厥初

老牧鞭羣羝长鸣度荒圃眈眈黄于菟怒攫连四五弱肉强之食兹事由来古天地果好生生羊勿生虎

溪翁撷佳草日恐饥其鱼霜枯野水落獐獭搜无余翁归束藁人寘彼溪之隅责以警长夜翁计何其愚

有山莫栽桃有地宜种竹此竹岂不佳清阴蔽茆屋朝有孤鳳翔暮有白鶴宿桃花

艳春风蜂蝶趁麓俗花谢不复来相媚一饷足

古意【六首】

折柳系离船船行柳条短頼有枝上花飘泊随君远

采莲莫采花采花损空房留房结青子种作明年香

匆匆采桑女花雨湿襜袖春风十二弦生世未触手

浣衣轻浣布布缕不如丝丝坚犹易穿布弱从可知

佳人买明镜意重轻千金结以双罗带欲照荡子心荡子渺不归镜影春云深

贱妾燕子身衔泥巢君堂遊子黄鹄志辞家犹南翔采花为谁容袭兰为谁香安得
小心风寄子双明珰

杂言

苍梧閼弓劒阿阁无祥禽鲁叟已长喟矧敢求之今区区莲勺人伯气方浸淫纪年
侈嘉瑞作物诚何心隱显殆偶然岂必闻韶音黄河千丈浑岁月亦已深矫首不可俟角
里芝山阴

勋华不并世揖逊无余传緬彼巢与津佳兵岂其天履霜一何微坤冰一何坚谁谓
知几人尚俟观伊川斧袞了不公正閨杂纪年岂拟王仲淹而愧鲁仲连

燕赵多佳人珠华衔天街郑鲁有游女折杨弄青梅春风趁姿媚谐笑争徘徊幽闺
有贫丑修洁不自媒缝布以为裙断荆以为钗■〈角奢〉沙事机杼蓬沓蒙烟埃谁将
好德心为尔停渐台

枯桐斲山骨弦以冰蚕丝信指发孤调悠然造希夷扬以寄吾欢抑以寫吾悲悲欢
生我心无庸他人知我若有黄金不铸锺子期寄语伯牙翁絕弦良可嗤

牧童

栉髮吹松阴坦腹睨岩石细雨整短蓑斜阳撼长笛采花艳两髻挟草暖双腋欵欵
跨牛归苍山暮烟碧

题东坡蔗滓窠石

空洞如虚拳拥肿类竒癭槎牙老树身相依以为命智士能用屈榴皮胜毛颖先生
倒啖余此正入佳境

悯盆松

物生天地间细大各有容伟哉霄汉姿厄此盆盎中嗟吁尔橐驼局促吾苍龙馳今
顾我笑可悯岂独松

猫犬叹

饭猫奉鱼肉怜惜同寝处饲犬杂糠粃呵斥出庭户犬行常低循猫坐輒箕踞爱憎
了不同拘肆固其所虚堂夜搜搅忽报犬得鼠问猫尔何之翻瓮窃醢脯犬虽出位终爱
主猫兮素餐乌用汝

荅释子问诗灋

汝家有子兰诗体能入选尔后岛可輩徃徃以律变选律固无择语意忌庸浅大音尚和平至味贵悠遠归欤事斯语妙理千万变欧称九僧今不见退之拟过红楼院

诸公赋东园兄铜雀砚甚夸余独不然然苏长公诗铭梅都官长句皆尔如谓举世争称邳瓦坚一枚不换百金颁不及鸳鸯飞乃有科斗情入用固为贵论古难与并之类是已敢并为之反骚

临洮健儿衷甲衣曹家養儿乘祸机匹夫妄作九锡梦鬼蜮敢学神龙飞负鼎而趋不遑死筑台尚欲储歌舞但知铜雀望西陵不觉妖狐叫墟墓分香卖履吁可怜所志止在儿女前竟令山阳奉稚子出尔反尔宁无天陈留作宾向司马包羞更出山阳下国亡台废天厌之何事人犹拾残瓦古来观物当观人虞琴周鼎絕世珍区区陶甓出汉贼矧可使与斯文亲歙溪龙尾夸子石端州鸕眼真苍壁好奇不惜买千金首恶宁容污寸墨书生落笔驱风雷要学鲁史诛奸回请君唾去勿复用铜雀犹在吾当摧

天下第二钟歌钟在弋阳真如寺破庑下其志天圣二年也刘石扁曰天下第二钟旁书江南徐铉书笔力皆遒劲可爱不知第一竟在何许而此又濱于埋没可慨已因歌以遗寺僧使屋庇之

濒江破寺如胶舟大镬露立寒飈飈金绳鐵纽作断綆土花苔碧生桀头我来摩挲考岁月倭指落落三百秋想当营度欲鼓火野鬼夜哭山精愁铸之以绍威六州之鐵衅之以景升千斤之牛载之以长河万斛之舰贮之以齐云百尺之楼风高一撞撼天地世更几变宜追蠡眼中惊见已无双天下才称为第二庚庚古扁磨苍珉徐郎妙墨吹玄云声光喑哑尽埋没宇宙颠倒方纷纭昭陵石马化为土于上蒲牢幸存古山僧作屋穩蓋藏他日岐阳求石鼓

题危见心所藏陈常庵水月障及松鹤芦鴈各一首

陈郎笔势并州剪十幅生绡秋綠遠老蟾欲作骑鲸游推堕玉盘波底转谪仙濡袍窥采石东坡醉客歌赤壁两翁已矣爱者谁我欲扁舟擡长笛

墨池幻出虬龙蟠徂徕山头烟雨寒胎禽独立衣綈綈骨瘦西风拾瑶草灵根琥珀三千年紫皇勅赐青城仙乘轩窃禄正自恶何似归来一丘壑

风吹黄沙石碣冷霜苇无声弄寒影兵尘隔断衡阳云溪藤卷送潇湘景芦花雪老菰米秋芙蓉露下天悠悠阿奴呼起字不断寫出万斛江南愁

赠福希范游

伽梨点破长萝绿瓣香问信黄梅熟筇云笠雪霜色寒法宇归来诗满腹春风破晓来打门行矣庐山与天竺天空云遠意未尽却上天台恣遊目吾闻天台石桥滑如竹千僧万僧畏涉足请师了此一大事一洗世间凡眼肉浮杯试罢海风高归就梅花结吟屋

赠后山僧谦自牧游

为僧不游酰瓮鸡游不名山沮泽龟见山无诗僧亦俗诗不高古犹无诗吾谦年少鍾老气髮根甫断拨云去归来笠雪两肩寒已觉囊中有佳句一枝瘦杖万里心策策尚

欲穷幽寻湖光山绿上下竺谷花溪月东西林我亦爱山行不得把酒高歌壮行色为语
春风九里松题诗野客今头白

叹屩词

履穿无下叹东郭桃椎尚欠居士屩是谁业屨捆秋芒絶胜编屨便行脚花泥溶溶
草露滴山石齿齿苔烟碧江南林壑天下奇不识春申珠履客

临邛道士招魂歌

锦袜生尘脱红玉琼蟾夜抱金娥哭芙蓉露瘦寒花钿鵲楼空冷银烛轻鸾小鳳
横紫箫彩云密漾青霞绡桂心沁入鎖子骨蕊宫贝阙天都遥玉床夢断心欲死独抱秋
衾咽香髓方瞳白羽青筒书驾月骑风渡瑶水琼楼碧户翠雾香紫兰结佩红薇囊云车
仙子不可识芳卿寄谢真荒唐蔗浆不饮啼寒泪不悟齐人少翁诡安得天上蓬莱宫却
着人间马嵬鬼

别离词

郎从江上买行舟妾对江枫生晚愁鴈云不断楚天碧望郎怕上水邊楼
渡江桃叶郎莫歌巴西竹枝愁更多黄尘百丈水花黑把酒劝郎无渡河
丫头岩诗载墙壁间无虑数十百首形容盖有尽之者矣輒复寄兴以俟采诗者择
焉

色盛人自怜色衰人见弃人心不可憑女色焉足恃未笄化为石不愿从夫壻厌华
喜质如梁鸿布衣操臼当相从君不见汉家天子刘文叔郭后容衰亦遭逐何如山头化
石不嫁老亦足

女色无丑妍入宫皆见妬蛾眉等刍蛹嬉笑藏刀锯未笄化为石不愿长门去国风
直待歌螽斯委身事主妾不辞君不见赵王如意今日死明日佳人亦投厕何如山头化
石千岁老无子

题曾達臣草虫

螭蜒走昂头螳螂怒张臂走欲捕生怒欲制笔活能融两虫意无人饭汝金砂红糜
肌粉肉牢守宫草间敢尔夸英雄捕蝉幸脱黄雀舌轻鬪悬知腰股折力微谨勿当车辙
书马使君所藏草虫

晋陵草虫妙天下一幅千金不当价谁将此本送使君蜂蝶数辈蔬一根此蔬雅淡
无色香嗟汝蜂蝶空疎狂人间桃李千万树有翅奈何不飞去

山谷跋杨妃齿痛图谓多食侧生致动摇其左车是殆不然因为翻案天寶遗事云
时罗公遠进药明皇自和饮妃故并及之

蜀帝化子规啼血思还家玉环苦微疾寄汝呼痛牙物类相殊或相托悲鸣一夜梨
花落三郎玉柙已成尘半匕金罍谁和药紫驼翠釜不生兵何与涪南新侧生人间极宠
皆祸兆莫把妖魂幻飞鸟平生误识安禄山马嵬欲死先齿寒

鴈塔

君不见春初淮白鱼秋深黄雀儿川潜山泊谁得知灾身不幸甘且肥官饔弗渠赦
竟作一网打头颅千百奉苞苴猩红熊白风斯下吾生亦何好独坐味颇厚急符星火督
虞人覆巢空类无遗噍宁逢江南射生手莫遇鴈门馋太守

荷叶

爱莲尽爱花而我独爱叶水仙剪圆碧万柄相倚迭风掀翠釜举露浥蛟珠晔不必
满川红香气自熏浹龟鱼荫凉影鹭鸥憩别业洁可包龙城贾客之饭清可制三闾修士
之衣大可载太乙真人之卧高可葢桐江神女之归醉仙卷作碧玉盏歌妓携来绿云扇
有时听雨隔窗眼湖声十里钱塘晚

题叶氏分绿亭

山亭种花厌脂粉纯种芭蕉三百本一心生意展不尽四面蟠根培自稳卷舒风日
闪流翠泚泚清阴浸窗户烦君净拭湘竹床着我横眠听秋雨

棠渡初雪

雪风吹冻水人须老梅着花明矮篱黄芦萧萧白鴈落野树厯厯青猿啼旗亭有酒
味苦短地炉湿薪烟粗暖五陵狎客不下楼红金火阁玻璃盃

古镜词

人生两瞳子烂烂岩下电见尽天下人不见自己面古哉容成侯作我眼外眼我老
得君照君老还我见薜花绕背字痕青仿佛阳冰八分篆神光一点未埋没尤物千年几
流转君不见扬子江心水如练年年铸入凝阴殿后来血染江水浑至今端午人闭门

次韵旷翁四时村居乐

欲晴欲雨天溟蒙林塘淡荡摇春风游丝落絮斗飞舞野花芳草争青红南园北园
桑柘绿村前村后啼布谷蚕姑把叶祝丝多田翁拜社祈年熟

藕花分房菱出角瓜实累累蔓篱落稻田水多翁不愁日抱筠筐晒山药清溪濯暑
生布裳石甬煮透山泉香涯南老屋颇宜夏草窗瓦枕松风凉

鴈云漠漠梧桐秋风露飒飒生平畴芭蕉叶黄夜气湿老壁屈曲行蜗牛林外炊烟
暗青树墙头凉月惊鸣杵柴门犬吠人语多刈熟归来碧天暮

黄鸡懒啼霜月低青羽乱啄梅花飞鸟健怯寒不出圈白犬耐冻时穿篱老松堕枝
供武火枯蒲织席遮窗破一窝容膝暖即休不问瓮中天几大

木绵布歌

吴姬织绫双鳳花越女制绮五色霞犀薰麝染脂粉气落落不到山人家蜀山槿老
鹄衔子种我南园趁春雨浅金花细亚黄葵绿玉苞肥压青李吐成秋蠶不用繰回看春
箔真徒劳乌鵲筇滑脱茸核竹弓弦紧弹云涛挹挹玉筋光夺雪纺络冰丝细如髮津津
贫女得野蚕轧轧寒机纬霜月布成奴视白■〈迭毛〉毡价重唾取青铜钱何须致我
炉火上便觉挟纊春风前衣无美恶暖则一木棉裘敌天孙织饮散金山弄玉箫风流未
逊扬州客

题云锦刘从甫水竹云山亭

玻璃冷浸清湘玉白衣暖护秋屏绿淮南公子有胜情收拾四美归吾亭问君亭中更何有解事家人频送酒客来醉赏不得归拍阑朗诵亭中诗

解碁

两雄相持机不发一着输先智相轧退守皆虞虎穴空通和不肯鸿沟割危枰已属堕甌里巧势争看强弩末疲思嘿嘿鬼神寂密运茫茫天地阔悍鸡趣斗不暇殊骏马争驰各忘秣矰禽睥睨欲高举置兔迷离思远脱死中求生背水阵灰冷复焚余烛跋白登倏报沛公走阕与俄闻赵师活傍观骇服算入妙对局虚骄气方夺人生胜负何可期生達难欺死诸葛推枰一笑拍阑干满袖松风凉泼泼

题陈抟题壁图

长松稍稍老烟雾瀑泉飞落千丈布树精摇手不敢呵雅是仙人熟眠处睡蛇未死惊起来风吹野服冠崔嵬双髻窈窕磨老瓦墨汁湑湑翻莓苔一翁拥簪供扫壁一翁耸膊观落笔欲寫未寫方昂头野趣含秋正萧瑟先生壮志神龙骧欲跨八表提天纲市衢呼酒沃侠客岂肯老死苍山傍忽来驴上听鸣镝中原王气开皇极心事西峯一首诗真人自在陈桥驿

酬春湖史履庸惠四皓图

有客有客吾春湖踏霜打门呼老夫寒温粗了不暇坐两手奉我商山图皓首厖眉髮如漆千古高人谁畫出踈行大字各题诗颇类涪翁老年笔綺里季夏黄公春风拍浮酒两鍾仰天但觉宇宙窄麾塵一扫尘凡空东园角里更萧散石鼎茶瓢风日晚琵琶不作儿女悲横琴静送飞鸿遠周家遗民方避秦留侯眼高识天人翩翩小出奠危社落落高举连青云感君持赠慰枯槁玉雪辉辉见诸老何当乘鹤参翱翔风露清凉咽瑶草

浣纱曲

浣纱如妾心皎然照冰雪秋声入络纬炯炯织霜月裁衣嫁作梁鸿妇白髮相看如此布不学西施矜媚妩妆成欲觅君王顾忘却土城山下路贪向铜龙溪邊住明朝吴骑猛如虎献入娃宫作俘虏含羞短制衣楚楚忍学翩翩鹤翎舞【土城山西施浣纱处】

田家词

大儿荷锄去疏麻小儿提筐来采茶翁自决水灌秧芽今年续食不可望一夜老风摇麦花

昭君出塞图

长门寫遍泥金帖春风暗老如花靨臂纱尚护红守宫妾命君恩尽如叶一朝结束嫁荒陲一马前导五马随老奚并轡相笑语双袖自抱琵琶啼邊风吹碎心如梦云长只有孤鸿送早知毡帐是羊车却把黄金博青塚向来玉鎖摇铜环咫尺不得窥天颜祇今墮在万里外日光那到祁连山女色自矜还自悞画史欺君君莫怒甘向匈奴作妇翁而翁首祸羞千古

与標轴工郑老

君不见世南人间行秘书撑肠拄腹搜不枯眼空千古不留物更用芸香祛蠹鱼又
不见王家楼中五百车锦衾玉轴籤红牙夜生光恠射东壁神鬼错愕相惊嗟无形之书
不复见有形之书今亦鲜吴依鞭马驰京尘何曾着眼鸡林人弓刀自带封侯相黄金不
博青藜杖请翁少待三十年怕有米家书画船

旧有歙砚雅宜墨鑱贱号于阴以乱亡去十余年矣忽见之村学堂中睨视间有艤
然持之却走者如恐予之取也因作此以遗砚

冰蚕吐丝寒玉苍老龙磨角玄云香半生食汝充饥肠正尔悒悒伤弓亡一日到眼
惊余皇欲呼未见谁鬣长庸奴自愧取不臧艤然持之走盖藏呜呼得失安可常我不善
保遗渠殃苟能藏之殃而祥但随牛后失所当枯竹尚作神龙骧安得石精变化飞堕桑
君旁塞翁失马心清凉

雪吟效禁体并去一切熟事

羣仙碎剪明河水须臾变换人间世重阴漠漠不分天万里茫茫更无地回飞慢舞
忽交急清壑污渠受平施虚光眩转混昼夜终日縱横絕声气埋深矮屋火无功卷入空
檐风挟势无同那得羽相似怪见惟惊犬羣吠调和稚子割蜜脾涩缩山翁鸣屐齿秃苍
捕雀花两眼戏客捏狮红十指径须醉赏腊前三纷纷尽是明年米

题陈所翁为叶半隱作全龙邀同赋

鸱夷饮江共晓汲麈尾拂屏翻墨汁密云黯黯扶天来黑风冥冥吹海立涛奔浪骇
恣神怪惊起苍龙九渊蛰须髯怒插霜戟寒鳞甲光摇春雨湿身蟠遠势欲万里吻渴沧
溟归一吸僧繇汗背叶公走祗合庸奴事供给所翁湖海陈元龙小傍皇华在原隰酒酣
作画特余事大手能旋倚天笠只恐通神风雨急抉破天门夜飞入明日山翁倚屏泣

题赵大年奉议小景

江头古树片叶无槎牙老龙爪角枯风含雪意天欲晚冻栖不动鸕鶿满翩翩四翼
来何迟睥睨欲泊无空枝寫生贵活意独到明朝嘈杂听渠噪

煎后山峯上人新茶

拣芽穰穰鹰爪黄活火瀝瀝鱼眼汤扫花席地白日静穿帘透户春风香唤醒松根
渴睡汉五更清梦从渠短泠泠灌顶欲通仙稽首法云甘露碗

蒲席歌

君不见象床金缕黄龙须翠帏茸毡红氍毹凝香燕寝环琼姝美物作恶常须臾能
令王孙泣路隅富贵不到山中臞霜空鴈落寒陵肤西溪女郎织春蒲作席眼眼涵清腴
髮僧方丈供横铺苍烟翠雾不可摹摩挲温厚便鹤躯高眠麴麴忘朝晡遠梦飒飒生江
湖楮衾竹榻蒲为徒观美不足安有余更生九节寿老夫百年与尔同卷舒清风傲兀超
几蘧

严氏古琴

苍梧弓劒俱尘土一片枯桐尚传古有弦弹入碧虚寒彩凤应来兽应舞物真物賸
不必论立名幸有古意存南风不作民正愠我欲抱渠招帝魂

祷雨积烟山之龙潭有应

神饒鬼凿深无底谁敢然犀照秋水苍生望霖龙不起蜡丸笺心聒龙耳髯张尾战
珠脱腹仰天嘘气阳侯哭铜瓶偷湫未及屋黑云崩山雨如竹

射虎行赠张生

深村落日啼寒乌中有十数黄于菟饱吞獬狗未足醉时失行客惊相呼苍髯老翁
百夫勇蹶张强弩金仆姑潜机夜半发乘矢黄髯白额殲其渠寝皮食肉争赏快入穴取
子无留余呜呼山中猛虎今已无人间苛虎谁驱除老翁负弩先辟易此虎咆哮角而翼

题明皇醉归图

金车山重牛难挽五花嘶出长春苑太官供■〈去页〉宴骊山三郎沉醉归来晚
酩酊马上扶者谁秀眉照眼两国姨红香把臂手亦软三马相倚不敢驰黄门拥道尽端
美锦衫绣帽春风起解醒尚恐需余尊捧把玉卮行复止最后一马寿王妃鸾扇夹侍双
琼姬酣酣嘿嘿意自远恨不酖我渔阳儿图陈无逸今安有却作醉徒供畫手昭陵百战
大山河凉州几瓮葡萄酒

儿馁嗔郎罢妻寒怨藁砧唐眉山诗也戏为笺之

父天不可嗔夫君不宜怨要知古圣贤贵在素贫贱父常煮字不成饭夫常织文不
成绢衣羸布衣齧藜苋去耕原上田徃种陌上桑获云秋穗重绿雪春丝长汝温汝饱官
征忙翁出校书为汝偿

赋壬一侄孙破砚

山翁手持青石骨疑是元宾瘞中物支床捣练应不然中裂何由半存没冰池既决
不可堤镜面已破那能规達人不必顾堕甑好事大率逢轰碑寒蝉饱饮供晓滴尽了山
中病磨墨太和磔裂三千年何处人间有完璧

与图书工罗翁

木天荒寒风雨黑夜气无人验东壁天球大玉生土花虞歌鲁颂谁能刻翁持鐵笔
不得用小试印材蒸栗色我今白首正逃名运与黄杨俱受厄藏锋少蒺藜时或至精艺终
为人爱惜固不必附名党锢碑亦不必寄姓麻姑石江湖诗板待翁来传与鸡林读书客

剩语卷上

●钦定四库全书

剩语卷下

（宋）艾性 撰

○今体诗

杉树牌晚憩

倦童呼不诺久客坐长叹野色归烟暝秋声入雨寒阅人江树老经火路牌残近郭

鱼羹饭招呼作晚餐

客归

髮僧行脚倦归计上心忙秋老蝉声短江空鴈影长乾坤无了日霜露感殊乡遥想梅花未还家定雪香

过石泉寺

藓壁作怪画石泉操古琴藤多山木老僧瘦道根深白鹄随人饭青猿抱佛吟经过恨不数带雨度遥岑

雪尽

雪尽孤峯瘦家贫老梦寒春鞭双影动岁节五更残努力三餐饭滋身九转丹时危从道丧不敢弃儒冠

吴种柳枉教輒复奉荅

天地穷东野江湖困子长逢人双白眼衙俗小红裳旧句传枫冷新吟带柳香还能相料理亦足慰凄凉

平塘陶使君挽歌

今代平塘老前身靖节翁死知随物化贫与不官同仕国棠阴在休亭蕙帐空容人方竹马楚些已西风

饭客

菜剪堯时韭羹羞晋代莼家寒多食淡客好不嫌贫一夜小窗雨百年华髮人明朝未须去老别最伤神

谢吕云叔饷墨

苍苍乌玉笏岁岁到山翁君眼何曾白吾颜自觉红一生磨不死万事寫成空回首柯山路凄凉不复东

丁亥冬大雪十数作邓清旷以苦寒吟见寄

十雪势未已一冬天积阴背风留更久入夜落偏深禾稼连冰柱天花幻玉林遥怜五峯老尚寄苦寒吟

病中即事

支身惟首健随事与心违病久药为饭寒深火是衣矮窗看日度远梦傍云飞可比梅花瘦呼童试折归

正觉僧榻

赞公分半榻卧近竹西楼四壁寒蛩夜一山黄叶秋梦随三鼓动月尚半窗留零乱芭蕉影禅衣烂不收

哭林止庵

止庵诸老行今日九原人头为谈经白家因好客贫欲铭贞曜墓来哭广成真俯仰南湖月瑶琴锁碧尘

日永

日永驹难过庭空雀亦无花招蜂出早草碍蚁行迂蕉叶露台掌水光天影图下帘
便道静烟篆起茶炉

癸巳小至

舌在贫何害脾清瘦不妨天心半夜子道脉一分阳山色春秋老梅花天地香半垆
煨芋火意味颇悠长

尽日

尽日坐谷口看云生岭头蝉声偏占晚菊色欲专秋江碧水心淡叶红溪树愁乾坤
万万古流转一虚舟

次韵秋心

短髮白已尽寒花黄到今秋清山见骨年老树留心独鹤离骚怨虚泉大雅音冥鸿
不知处引睇暮云深

秋阴

老蝉吟渐懒愁蛭思无穷数点菊花雨一溪茅屋风苔衣秋井绿枫缣晓山红急索
鹑裘补寒先及老翁

番城晚眺

独眺秋愈远孤城日渐曛地平浮楚泽天阔见吴云风静渔歌合波摇鴈影分未应
陵谷变不得问番君

道中

共僧分晚供呼渡立桥东鴈背西风紧渔梁落照红云添疎树影叶补败船篷旧日
津亭酒黄垆蔓草中

觅宿村溪远逢人面目生习移多佩犊气怒斗呼鹰天阔秋阴重风高夜柝惊迟明
懷宿饱股栗履春冰

有感

江汉亡维楫山林困蒺藜头颅春雪重心绪晚云低挂树蛇留蛻踰垣虎印蹄遥怜
伯劳燕辟地各东西

谢吴子与惠诗

解后西风野菊黄别来冉冉历三霜未偿诗债如山重曾结交盟引梦长老病终年
亲药裹清谈何日倒书囊闻君读罢多娱乐萱草春深棣萼芳

冬夜抄诗作

笔债穷年老髮僧砚寒还复夜敲冰西堂梦后无灵运夔府归来有少陵诸老文章
凡几变千年风雅欠中兴矮窻烛暗成惆悵忽见梅花月一棱

送客至灵谷

僊林路细出山腰灵谷峯高入紫霄立石借为题字壁倒松因作度溪桥雨花湿地

人归晚烟草迷川马去遥记得玄都种桃处黯然分袂各魂销

重赠星翁陈跛子

拄拐蹒跚鬓雪明向来小范亦分羹十年不见疑先死一旦相逢似再生尽乱亦收诗卷上长贫犹挟命书行试言何物妖星照是处青山白骨横

旧庐毁于乱十年矣吾老他寓每不能再葺戊子冬良异聚芸人之资自构小堂因以勉之

旧址相传五世昌寒荒忍堕十年荒老吾衰落空懷土幸汝辛勤自肯堂袖里莫忘无恤简墙头犹有孔明桑地灵旧日鍾文气且要扶持此脉长

桂花

秋树婆娑风露凉老蟾落子种虚堂胚浑天地中央色漏泄神仙上界香贫里忽惊添粟满老来不动买花狂带愁莫上黄楼去归隐淮山兴味长

酬邻僧惠古杭芦管兔毫

黄芦笠泽剪秋雨褐兔中山俘饱霜千里能随云衲远数君肯顾草庐荒无情书传方高阁何处尘埃有画墙留与素翁修菊谱寒花吹入墨云香

义马冢

诉得冤伸意始休敝帷埋骨几经秋兽心犹办死报主人面却甘生事讎作传自应班豫让论功何止及留侯世间义字无人识寫在荒丘马冢头

题艾溪溪直严州学宫前余始祖实溪上人靖康避地于抚溪尾为艾原方干为原中客赋诗者此也

睦城西下柳阴阴以艾名溪古到今鼻祖桑弧蓬矢地耳孙乔木故家心应无别姓争墩住曾有高人对客吟欲向原头拜宗老西风落日暮云深

与雪舟杨子圆十五年不相闻一日辱和猥句更号皓隐因复奉寄

羞把长裾事走趋已将身世混樵渔畏途咫尺如千里老友多年欠一书最喜山人题皓隐莫教帝画到幽居欲寻载雪舟边路来为盘翁赋遂初

寄清旷邓隐夫

去年菊里辱经过秋思萧萧又草坡兵火东南关气数交游湖海隔风波书緣辟乱经年少诗想忧时近日多倘有鳞鸿幸相寄青灯无奈忆君何

次大五侄问移家韵【天觉】

投老移家僻坞来满林秋露洗黄埃饭纔种麦须堪饱衣旋培桑未可裁万古乾坤如传舍一生风雪叹江梅相看喜有青田鹤肯与诗筒日往回

移家寄诸丈

十弓荒圃百弓山缚草编茅屋两间鸡瓮不知天广大鹤巢已觉地宽闲胜心扰扰双蜗角畏路岩岩九虎关退一步行差得计野云深处即商颜

再答诸丈见和二首

神龟为我作天山合住清泉白石间岁月短梭人易老诗书高阁士方闲秋鸿社燕
炎凉势沧海桑田梦觉关近屋虬松三百尺时时相对各苍颜

肯为刘安赋小山几时鸡犬过云间命穷无用三千字蹄蹶难供十二闲薄酒程头
多隔县故人踪迹半阳关何当共嚼西岩雪嗅取梅花一破颜

游古汴赵氏溪园

不起楼台作热官小园回合抱溪湾露溥花靥春红湿烟护松髯晚翠寒已向掌中
旋宇宙正须胷次着云山可能再为苍生出鹤怨猿啼搅夜阑

次吴寿翁溪园韵寄题

营营谁肯卧沧洲喜有高人此枕流得水最多知地胜种花无数欲春留图传笠泽
三分画梦绕黄淤十里秋料得江枫吟未了载诗应汗滴仙牛

拜五世祖妣墓

敬脉人人似饮泉扫松罗拜喜争先颂琴不朽终流庆石仲相看莫计年沧海桑田
谁料此秋风宰树幸依然五陵莫说骊山下愁絶求羊一穗烟

辟乱逢故人

乱里相逢各自忙少依松影话凄凉古来尚有种桃处今去当传辟穀方马蹴黄尘
遮日暗鬼吹青磷隔林光海田未必非天数空对西风老泪滂

题友人归隐图

买山长说欲栖身画得图成隐始真半枕虚堂生草梦一溪流水种桃人但知樵客
当辞汉莫与渔郎说避秦早晚相从弄明月细听唤铁响苍筠

意行

意行行到野人家门带清溪石径斜落日轻烟山可画短篱頽堦菊能花归迟悞客
频敲竹坐久劳人再煮茶那得宽闲无点事日搔短髮问桑麻

庚寅二月朔积雪初霁过和山见雪深堂瑞香盛开回过烟雨村则庭中花更早亦
未歇也得数语録似二花主人

烟雨庭前锦伞张一般秾郁雪深堂偶扶晴日孤筇出连挹春风两屋香供佛省烧
苍栢子薰书不藉緑芸囊冰霜尽厄芳心在自与梅花是鴈行

废贡院为米廩过之值盘飧

担夫勇似踏槐忙卫卒严于夹棘防千古文章成画饼万人场屋忽敖仓籍存尚或
思班爵礼废宁容并去羊立尽斜阳还独笑功名自古梦黄粱

示子良异

霜雪林头又緑稠乾坤生意几时休人情葵扇炎凉态世路瞿塘上下舟鳌跛未输
螭百足茅封不敌橘千头细看不似吾儒业一片书田或有秋

赠数学姜兄

向来涂抹趁春妍老去栖迟叹雪颠一倍法灵君说数三生縁定我随天正须花外

羈奔马莫向桥南听杜鹃见说侯封容易觅紫茸靴袴锦鞍鞞

赠谈数陈改之

投老江南黄叶村菊花时节雨昏昏矮窻孤梦正欹枕拄杖一声谁打门三字头衔
康节数一编心易华山孙吾年渐似璜溪老尚把灵光许独存

谢惠楮衾

厚于布被拥公孙清似荷衣伴屈原卷送春云香入梦剪成秋水淡无痕五更葭管
嘘寒谷一榻梅花近雪村直作黄紬纹锦看日高睡稳不开门

观潮

按节波神逆水来鱼龙掀舞斗崔嵬浪高峯顶青天雪风助江声白昼雷势欲上时
掀海立怒无泄处触山回世间亡国知多少谁似灵胥恨未灰

悼亡

秋瑟凄凉忽断弦自砑山石志新阡稍闲即病身无福竟死难医命有天会绩忍看
烧烛泪遗簪聊抵买花钱最惭误看刘蕡策辜汝相依四十年

死生最怕堕危机乱世全身正自稀满地干戈殊不定盖棺丘陇未为非鹿门不共
龐公隐鳳褐谁缝杜老衣愁絕梧楸烟雨地藁砧百岁拟同归

人名诗戏效王半山【此体权德輿已有如半纪信不留齿髮良自愧之类皆勉强
凑合不浑成惟半山诗云莫嫌柳浑青终恨李太白之句过权遠甚但青字亦外来似未
纯美耳】

重耳盈盈岸柳黄九龄冉冉涧松苍梅开小白添新雪鸦引童乌弄夕阳樵唱转低
春谷永鴈声不断暮云长奔泉浑作山涛响溅入悬岩百药香

偶来安石坐林塘因得栖筠受晚凉归鸟冲烟方陆续寒花经雨尚黄香云如仙客
踪无定风作山宾语自长师古不成书谩读乐天深结退居房

湖阴故人家

水痕落尽见晴沙步入湖阴处士家梅一两花春尚小鴈三五字日初斜百年耆旧
多思洛五夜精魂半梦华珍重瑶琴莫轻拂西风江上沸芦笳

捻髭

细捻寒髭缕缕霜未须惆怅惜流光近山归鹭分明白过雨斜阳浅淡黄春入桑榆
花影瘦门无车马草心长暮年一卷参同契觅得安神不老方

赋太和寺同根红白梅

雪影萧萧带晚霞胭脂灼灼傍铅华孤山夜合连枝木一树春分二色花牛继马来
几换骨鹤乘鸾去忽通家向来逋老题诗处曾有红裙拂碧纱

滕王阁

木老江空鴈阵秋阑干倚尽思悠悠舞衫歌扇落春梦山雨浦云牵暮愁半壁夕阳
千古在几朝王气一时休献陵无树供寒雀信是劳生枉白头

赠绳伎

絕艺当场万目倾两竿朽索半空横反提双女摩肩过仰射孤鸿信脚行胆似子龙
身里满体如飞燕掌中轻弄潮已叹呉儿险更有人从死处生

日食

谁撤天门虎豹扃羣妖食日上青冥一眉不及黄昏月万目惊看白昼星絕响无人
槌败鼓洗光何地激沧溟仰天凝注需阳复寂歷西风老泪零

穆陵大礼图

丹青百丈鹅溪绢缥轴南郊大礼图官隶威仪犹是汉山河风景已非呉秋阴汾水
年年鴈月黑连昌夜夜狐羣路莫惊荒草暗鯁膏灯灭出金鳧

史氏铁笛

蕲川老竹未为奇横截凉州黑玉枝阳燧无烟山鬼铸蓬壶乘月浪僊吹一声响裂
千崖石九曲亭标二老诗俗耳从前听不得壁尘蛛网故多时【武夷铁笛亭胡致堂朱
晦庵皆有诗】

苦雨喜晴早作散步

寂歷山房久杜门清晨踏碎碧苔纹池经宿雨添三尺花怯春寒瘦一分满地月凉
翻竹露隔溪风细度松云近来生计随縁足半畝荒畦手自耘

归大五侄天觉砚【天觉得乃翁遗砚于火壤中如初有诗志喜并谒予铭铭已就
用其韵以归之】

脉暖犹涵老藓斑眼花仍带泪痕潜厄于劫火元无恙意在斯文岂苟完一片墨光
留手泽浑家黄色上眉间只消半滴水蛛水涨起满村烟雨【寒坡翁澄泥砚诗云经火
尚含泉脉暖砚谱云鴈眼昏者谓之泪侄所居号烟雨村子尝为之记云】

留城

夜半辽东白鹤归旧来巢处立多时门关落日千家静旗飏秋风万马嘶文堰石台
空有讖画堂翠幙更无诗悠悠往事俱尘土只有寒流是古溪

题洪崖仙坛

树精不死卧松关呵护仙翁旧禁坛天阔难寻骑去鹤井香疑有炼成丹山如辟穀
秋逾瘦屋尚凌虚夏亦寒行遍苍崖无石髓空和凉月倚阑干

寒食后

寒具油干火已新流觴水暖酒初醺蔷薇半树花孤注杜宇一声春二分薄晚草心
先浥露久晴山意欲生云老来尚费闲精力自种窓前辟蠹芸

简敬轩何行叟觅墨

兵尘漠漠暗穷山零落难寻堕水丸见说陈玄老居士独留何逊旧诗坛快刀肯截
乌龙角破砚犹存紫马肝一笑磨人磨未了晓窓搔首雪霜寒

老竹

苍黄瘦硬立頽垣疑是栽时第一根早岁孤君惟二子暮年千亩尽诸孙雨鞭老迸
苍龙骨霜节寒封古藓痕消得培滋号尊者把诗题作野人轩

题贱容

骨多肉少与梅同老向江南风雪中万事羞称司马好一生不送退之穷偶贪识字
头先白稍欲工笄面即红说与丹青莫饶笔肩山只合付何充

除夕感兴

黔乌缟兔斗飞梭春树流年忆踏歌扫白了无烧药法守玄不及力田科人于淡处
交情耐梅到枯时生意多寂历风帘卷山雪醉眠不问夜如何

枕上

画兰重补纸床屏支石横眠道气清杜宇不啼春一半落花如梦雨三更老心暗觅
余年健万感偏从静夜生最忆寶莲山下月照人扶醉听吹笙

题古洪周君会梅阁【得梅境于洪因舍乡而家焉】

此花不受俗人知为汝移家亦絕奇至冷淡中参古意极高明处见南枝栋帘相望
滕王屋风月重添水部诗梦入梨云香不断有人携笛倚阑吹

老梅

摇落荒村野水涯貌枯神泽骨槎牙一生知历几多雪絕好只消三两花万木尊为
诸老行孤根淡似道人家儿时见汝今头白正拟相看度岁华

哭菊存蕙山二兄

黄台瓜蔓已凄凉五鴈飘零不着行一脉仅余三老在半年又哭两兄亡菊园霜熟
秋香寂蕙帐云寒春梦长愁絕吟魂招不得西楼风雨忆连床

哭环州先生

闲却秋洲野钓矶谁知遠出是危机一篙潏水虚舟急千里诗魂半夜归前月仆来
书尚健一生志与命相违亲庭已老儿方幼最为先生泪满衣

曾随计吏上青霄折翅归来困一瓢湖海十年乌绕树功名两字鹿眠蕉山图不及
生前买诗板姑留死后雕地下修文应未恶寒蛩虚馆雨萧萧

检历即事

古来系日欠长绳节物相催老自惊岁里春为花早计蛰前雷是雪先声移家燕子
商量熟开国蜂王去就轻最忆长安三月事有谁重赋丽人行

七夕对雨

门无辙迹草偏青屋带秋山意转清打梦易惊綦屨响载愁不去酒船轻幸无帘幕
妨云影尚欠芭蕉赠雨声欲送星鸾过桥去夜深河汉未分明

重宿芳草渡

曾卧江楼听雨声萧疎又似送归程正如老马倦行路忽有鶉姑啼晚晴绕屋种花
春烂漫隔窗无树月分明苍头不管人眠熟连报严城打五更

宿洪岩寺【寺贫敝甚而僧勤殊可语】

形枯面冷住山人仿佛钱塘老惠勤寺窳不充黄粟饭佛寒添绣碧苔纹秋声茆屋
三间雨野色松岩几树云嚼菜薰香清语久一灯明灭夜将分

看镜

自摩寒镜看头颅短髮萧萧不受梳天地风霜吾辈老江湖烟雨故人疎道穷分命
真如纸世乱功名不要书纵有黄金难铸错一编残易伴犁鉏

中齿忽折

老丑移形转可吁凋零已到骨之余似因漱石磨成磷幸免投梭折得踈根笋尚如
儿髭短医师欲实火田虚喜无干肺劳吾决含咀犹能味古书

除日立春【晚山危谦夫来访】

岁如旧政方书满春与故人同惠来白髮最愁新厯换清谈且博笑颜开屠苏卯酒
红生晕细菜辛盘翠作堆但觅年年各强健不妨日日小徘徊

竹杖

一枝九节称身长扶得衰翁气力强色点湘妃红泪雨骨凝王屋紫藤霜结交最与
芒鞋密寄友应含草拨香独有探梅时节苦相随江路雪茫茫

咏眠窝

独榻孤扉木几双小窝可受北风降带霜枫叶寒供火随月梅梢瘦入窻梦熟不知
衾似铁睡醒何用酒盈缸近山最有松声好卧听空潮上浙江

哭北谷罗先生

死到先生世道衰忍弹双泪看铭碑动随天去心无愧视得官轻事敢为他日史书
廉太守四方人哭老宗师不知精爽归何处定在梅花自在时【先生云无人描画无人
咏始是梅花自在时盖自况也故及之】

凉棚

数柱伶俜不架椽密铺松髮厚如毡御风难觅深蓬岛障日聊成矮木天肥瓠引藤
高浥露闲花借荫省浇泉热时构汝凉时撤不是疎恩势使然

郡楼九日

虹影初消雨脚收憑高聊复散牢愁烟横三市蜂房屋尘掩重门燕子楼黄菊自随
陶令节白云那管汉时秋鴈飞不尽乾坤大安得相从汗漫游

文节谢公挽歌

不甘摇尾乞人怜视死如归气浩然千古六经俱扫地独公一柱肯擎天乾坤万劫
英雄尽文节双高日月悬惆悵老身空有泪王亭无路荐寒泉

谢屏山吴显父惠歛砚

苍玉光寒篆紫烟重重封裹到梅边得君一片歛溪石即我终身绵上田少逵必穿
维翰铁尽穷共守子云玄老坡莫遣穷居后遠在茶坑鳳味前

立春日雪

晓炉香剂已烧残漫卷楼帘倚药栏鞭底土牛方转爨石边盐虎忽凝寒有人剪彩
娱羔酒独我煎茶续菜盘冰沍砚池呵未泮东风到底入毫端

雪销

红日行天熨绛绡一番阳长便阴消青山又现本来面瘦竹方伸久折腰枯沼暗通
泉细细晴檐忽听雨萧萧独怜点入吟翁鬓费尽东风不肯销

余踊感兴

笔耕长馁拙生涯何用撑肠着五车甚欲疗饥难煮字可怜不饱费炊砂老惭乞米
修竿牒贫欲休粮种枣瓜梦里不知时世换买珠犹自说京华

落梅

翠羽嘈嘈唤梦回罗浮峯下小徘徊霜风昨夜卷晴雪山路今朝无碧苔尚有瘦香
供玉笛不将余片点妆台少须鼎实明人眼却带江南烟雨来

岁菊【除夕正花故名】

不逐登高老孟嘉同来守岁阿戎家能将秋圃风霜骨直作寒梅辈行花香称屠苏
浮腊蚁色侵幡胜插云鸦老夫细把金英撷独拟明朝早供茶

江上

江上春肥衰草生林梢烟暖乳鸠鸣青山与我一面雅白鸟令人双眼明云净有时
看雨泣水平无处觅溪声折芳弄翠浑闲冗时与樵渔错杂行

偶成

似是轮囷老蠹鱼尚饶兰露入铜蜍诗亡正恐鲁无史士贱岂容秦有书世味几时
回橄榄秋山随地着蘧庐多情樵客能相问莫有余闲赋子虚

即事

一片轻鸿度小坡半泓浅碧浸丛莎黑云垂地雨声急黄叶满林秋意多短髮未冬
先有雪懒心如井不生波孤砧已报寒消息欠问眠鸥觅芰荷

过长林书罗文恭公碑阴【水心先生作】

人家落落堕荒丘碑带苍苔独自留博陆脊梁浮日月中郎铭笔法春秋一抔谁下
寻坟马片石今供砺角牛惟有斜阳闲照管肯和鸦影上螭头

失题

格磔声高午梦残戾戾歌罢酒杯干漫天飞去杨花乱着雨归来燕子寒世味淡如
和蜡嚼春山好在带云看近来习性浑成懒抄尽陶诗独倚阑

深冬

冻透松边屋两间孤床盘礴数更阑无情风雪偏欺老经乱衣裘不御寒春意一炉
红棗柚故人两坐绿蒲团敲冰自换瓷瓶水浸取梅花仔细看

安南贡象

锦鞦鞢勒度南云到处丛观暗驿尘人喜此生初见象我忧今世不生麟
半年传舍劳供亿德色中朝动搢绅粉饰太平焉用此只消黄犊一犁春

赠广信医博士陈云泉

见说云泉深又深定知巢入海棠林君医尚副穷时愿吾道全孤壮岁心
药笼有方玄白髮菟肠无分服黄金近来觅得安身法诸老先生夜气箴

郡中逢桐庐方水鉴相士

七里滩头曾识面五峯城里又逢君人间一瞬白驹日世事几番苍狗云
奇骨谁当侯万里匹夫那可帅三军试凭冰鉴从头问细雨青灯过夜分

观放鸬鹚

乌鬼淋漓受指呼江鱼终日为人驱扼吭不及能言鸭哇肉几同反哺乌
暂满空喉如瘿大竟无半尾塞肠枯少宽颈组方谋饱水冷沙寒日已晡

临汝书院落成诸公有诗用韵

鱼跃鸢飞喜落成鹅湖鹿洞共峥嵘世无孔孟乾坤熄学到周程日月明
议论高虚终害道圣贤平实不争名光风霁月元无迹分付庭前草自生

追和晦庵先生十梅韵

贞姿抱冰雪粲粲楚江滨照水淡寒影寄人生遠春【江梅】

微吟水部诗欲续广平赋须是铁心人方识花妙处【赋梅】

一阳未嘘枯霜木醉梦里照眼忽横枝令我折屐喜【早梅】

穷阴沍水壑霜月耿夜残中有罗浮仙洒洒风骨寒【寒梅】

苍凉遯荒野交与桃李絕遠聘不肯来为君三磬折【野梅】

苍根封古苔空腹餐冻雪老意暗生香丁宁勿轻折【枯梅】

天风开瘴烟独立山椒雪神人藐姑射相对成二絕【岭梅】

好花不必大骨瘦花自小一点春有余万古香不了【小梅】

萧萧三五花影落寒溪浅佳处不在多诗兴孤山遠【疎梅】

东风卷晴雪山意颇空寂扫花归作饭豫当调鼎实【落梅】

清趣

鸦丛桑椹紫蝶穴菜花黄水鸭眠依石竹鸡啼过墙

雨阑流水急风定落花迟一老临溪钓双童画地碁

晚霁

天空虹灭影风定水无纹半树挂残日千岩吞湿云

题四止庵【并序】

渊明诗云坐止高荫下步止萆门里好味止园蔬大欢止稚子四事适与予同因以
四止名吾之草庐而为之咏

团团青枫阴绰绰万间屋下有避俗翁扫石迭两足

松关深更迂中有安行路从渠马上人笑我不出户
本无食肉相每饭甘藜羹侯鯖岂不佳怯怯疑生兵
红楼艳歌舞乐极还生哀欹枕看儿戏好懷终日开
闻鴈

枯树淡秋影湿云凜夕阴江天一声鴈世事百年心
题素庵壁间六首

两椅熨秋竹一帘卷霜藤山风长夜寒兀兀挑青灯
风麤或卷茅雨饱颇生草泓然老砚池照我髮缟缟
闲花淡心事不作春风妍野竹三五枝引凉吹昼眠
松影乱书檐鸟声隔山屋有客抱琴来为弹芝田曲
霜崖白石髓火鼎黄金芽生疎不入梦饱饭煎江茶
红尘野马急老意饥蚕懒借取黄庭经时时漫遮眼

世言梅见外于离骚海棠不取于子美未有为解嘲者因作二絶
不受春风半点尘骨寒花冷雪为羣桂椒不敢攀同传正是骚人独敬君
态浓意遠骨肌匀睡起精神萃太真不用分明更题品诗翁已自为传神
月岩

不容天上妖蜚食却许山中狡兔眠两日见岩成二絶丫头不老月长圆
大佛头【古杭志云秦王系缆石刻成】

锦帆翠楫照呉川系缆犹存石岿然刻佛未灵山鬼过西风吹动鲍鱼船
渊明采菊图

餐英人去已千年留与先生泛酒船昔日避谗今避世黄花独识两翁贤
不縁斗米挂朝衣自是知几勇赋归莫把秋英等闲看商山芝草首阳薇
元旦

不管髩松雪满颠笔床茶灶度年年穷愁博得长清健多折梅花供老天
春溪二首

懒溪晴稳麦风斜桥影欹倾水见沙十里荒陂自春色一双鸂■（𪇔 鶒）𪇔杨花
雨香云嫩散朝晖细草初肥緑满溪无数落花莺背上避人帯入柳阴啼
钓台

不随龙去只鱼汀絶喜先生世累轻却把客星侵帝座岂因忘世未忘名
自有诸公作帝师故人相与竟何辞可能密密同床话不及周南第一诗
落第口号

万里长风鷁退飞自浇涧水溅征衣满身只有梅花影不帯西湖柳色归

轻柔杨柳挟春妍孤梗梅花结雪縁此是乾坤大消息相逢切莫说流年此予三十年
前赠先见赵太史二絶之一予亦不复记忆矣后三十五年太史访予山中恨诗不存

惟为予诵此而亦忘其一竟莫省为何等语也既征补之且告予以五星之将聚因作二首奉笑

识字田夫雪满簪种桃久矣入山深五星便是从奎宿不上黄花老圃心
太史谈天术转灵相看犹白眼青青步占若上清台去莫说江湖有客星
留城寄旷翁【翁时寓洪】

吾年七十入城府君更老吾仍出山早岁相期作深隐至今头白未能闲
六年不见云巢老端拟此来消渴心花落鸟啼春事阔不知何处倚阑吟
东溪水长船多上南浦草深人未回昨日君家问消息书归方索暑衣来
灌园

土渴羣蔬不肯青辘轳百转汲深清山翁到老谋生拙抱瓮崎岖博一羹
二十四夜梦到何许植物多瑞香觉而赋此

春风吹我游仙梦梦到庐山顶上来不记花多与花少恍然如步紫云回
秋风

千岩万壑吼虚钟病叶吹黄树树空寄语天公莫多事杜陵茅屋怕秋风
题龟峯僧阁

芦竹丛高荫石阑菩提香远出林端鴈声忽断梧桐雨草阁秋深倚暮寒
宣和御笔二扇面

纨扇轻盈寶月轮莺花点染玉园春憑谁为障西风起万里黄尘竟污人
黄芦白鴈小汀洲奎藻香罗一片秋胜似纈干山下雀冻飞不去使人愁
武阳渡

空蒙水气湿溪烟闪烁沙星照客船一片西风吹酒醒秋容多在鴈云边
题四皓对奕瀹茶圖各一絕

迭足支頤落子迟松风冉冉动须眉断蛇失鹿浑闲事不直云根半局碁
石乳云腴拨不开春风潋灩碧磁杯应无俗客烦敲臼只恐东宫聘使来
山宇

一方湘竹卧春阴数卷唐诗醒老心俗客不来山宇静新莺啼入杏花深
春晚

花风摆脱老红去穀雨将迎稚绿来我类文园病消渴晓窓和露咀青梅
观碁

揆先岐路不容差形定心忙寂不哗仙客莫嫌春昼短东风落尽海棠花
和靖祠与故宅皆无梅

得见梅花即见逋我来竟日觅梅无却于无处分明见月满孤山水满湖
术有号莘野钓滨者求诗各与一絕

撷青日日饭疲牛识字耕夫已白头束帛不来山鬼笑有人马上觅封侯

意钓秋江不为鱼六韬尚拟载征车东南腥血方涂地何用人间有此书
郡中玄都观追和刘禹锡诗【二首】

为爱听琴亦此来道香庭院得徘徊羽仙羞种桃花看一味湘兰遶屋栽
龟头突兀未生苔读罢新碑老眼开前度刘郎吟未了溪翁为作后身来
守分

穿窬暴富竟饿死博塞得官终族诛不惊宠辱老瓦砚粗了暑寒簷布襦
九日登抱螺峯呈同游

莫放龙山旧醉豪西风辇路暗蓬蒿目穷千里应惆怅頼得螺峯不甚高
补破为杜诗下转语赠老妇

一寒谁复解终袍百结重缝叹汝劳莫遣海图归短褐此身正自困风涛
石溪二梅佳甚翫索晚归

山根短日堕寒影溪上乱风吹结衣自怜野性老尚癖逢着梅花便不归
书琵琶行后

儿女情懷易得怜悲伤容或涕涟涟独疑迁客方沦落犹着朝衣夜入船
莲花市

春风十里莲花市红烛三更桃叶歌候馆羈人眠不熟梧桐窓下雨声多
避梦

困热依然梦不闲起蒙絮帽待更阑矮梅窓下清如水淡月笼霜鴈影寒
书无闷寮

硎谷冬瓜幸未生尚堪松下抱遗经春秋断烂无人读一点寒灯老眼青
风雪萧萧席作门奴星急把柳车焚脐中红炷两三日坞里黄金十万斤
喧啾百鬼瞰高明寂歷朱门野草生斗大山中茅屋好日长欹枕听松声
对客清谈妙入神舌干时与供先春东州米价北门鴈一语不须来溷人
与林止庵叶半隐分赋郡中古迹得鲁公祠右军墨池

遗像犹能立懦夫悬知生气摄萑苻三郎阿堵知何用只识营州阿荦奴
昏昏水气吐玄云自是先生笔有神不洗从来姿媚态可怜北面卫夫人
孺子亭

断草寒烟故宅荒高风千古映湖光独怜汉帝征车重不及陈蕃八尺床
木芙蓉

露冷红酥不带愁湘兰楚菊共清修灵均死去无人问闲却沧江一片秋
漫兴

支离矮屋护松阴半刻清闲直万金蟋蟀叫回秋梦薄一方凉月道人心
荒畦整整复斜斜不种春风儿女花却笑过墙蝴蝶乱懒随野老问桑麻
冻耳萧萧天欲霜冬深门巷意苍凉一筇径为梅花出独立斜阳影正长

富阳出陆

露溥芳草绿茸茸淡霭轻烟古画中行尽葡萄三十里海山青处日初红
留客

梭榈叶碎风索索枇杷子熟烟冥冥黄鹂三请我未出白酒一樽君小停
剩语卷下